

崇
雅
堂
詩
鈔

崇雅堂詩鈔卷五

仁和 胡敬 以莊

許周生駕部用李空同送昌穀長句韻見燿拙集兼送北
上抵都後依韻奉答並寄懷汪三選樓

陳言偶剽竊便爾誇能文遺殃到梨棗過眼如煙雲天公冷笑
世上人雕蟲刻楮爭紛紛千秋爲事況寂寞此言酸咽宜書紳
襖帖嬾學王山陰歸引擬續石季倫屠龍之技老不成千金敝
帚空自珍名都大邑載接軸欲以里唱諧天鈞先生絕學師漢
人風角圖讖千編陳未甘姓氏挂文苑已久名譽傳經神輓紅
插脚不稱意一帆歸臥滄江濱文章自古重華國那許郊藪游
麒麟感公宏獎望公起因公懷我同心人琴材抑塞止供爨蓬
山縹緲終迷津看驪成黃朱作碧嗜好久矣難逢真亦知窮達

不挂眼其奈寒餓難辭身可憐此子在邱壑有如絕代理風塵
送予正值秋榜發笑談胸次何嶙峋幾時天祿快攜手一笑使
我眉爲伸論交公自篤古誼橋接丁卯原比隣高齋追暑憶去
夏竹林游伴皆雅馴有懷佳人渺秋水寄遠其賦詩篇新人生
有情感離別但望南浦先含辛長安笑我因索米歸來兩見明
湖春匆匆歲月車轉輪聚首無幾還離羣苦難純味戀張翰深
悔荷製拋靈均三千遠道望難見四十生世慚無聞名山不朽
公等在駑駘未要追騏驎

古歌血槃

周衰不綱九鼎折歌血盟多究何益爾虞我詐積成風枉使頑
銅飲腥血載書已作改不難鬼神亦坐遭欺謾朝縱暮橫等兒
戲槃血尙熱盟先寒此槃流傳何代製歲月不詳無款識當年

良冶定心非不願標題示來世血漬模糊斑尙新土花鏽澀幾
千春處囊笑我非毛穎碌碌甘隨十九人

題英夢禪畫石

相石有成言三字皴透瘦夢禪老畫師皴法本天授興酣爲落
筆狀此一峯秀得無蓬萊山否亦小靈鷲色黝帶微赭中蘊土
花繡恐失石真形不著茅亭覆披圖觀畫石復以真石扣先生
笑而言石早不脛走掇石不掇金偷雅罪可宥長安逞豪華園
林爭結構疊石戲爲山平岡高列岫頽然無一竅粗醜祇貽詬
何如披此圖尙足娛清晝東坡寶仇池驚代託希觀碎之有頴
叔似達乃真謬與同斷琴焚甯使他人購但教畫長存如石在
左右此意真達觀更願慎所守倘逢米家頭籠之入懷袖

題屠琴隴雙藤老屋圖

琴鳴舊廬蕃草木文酒家居往來熟挾策同爲冀北游突兀雙
藤署君屋傲居笑我無一椽三年旅食身煢然朝騎瘦馬偶一
出過君往往宵忘還多君宿我藤陰處卻恐花開君早去天爲
詩人太寂寥春風三月畱君住君以親
者改近藤花開質屋來藤花謝征
車駕花開花謝任春風明歲何人醉花下甘霖漠漠隨君車我
看藤卽河陽花版輿遙遙莅君署我看藤卽長春樹紅塵插腳
竿木場東帶向人毋乃忙看花多在半開好願君及早歸明光
君歸旨甘倘足奉我亦移家與君共便把青藤當綠楊此樂何
如節麾擁傳舍浮雲不暫停由來地總藉人靈君不見宣武門
西藤一本至今名重曝書亭

英煦齋師所藏天啟三年小鐵斧歌卽次元韻

披圖足徵明祚敗如鑑寫形著測卦霜刃休看寸鐵輕三百年

基斲全壞九重多暇工雕鏤故劍肯向忠良求紛紛章奏棄不
省可憐神似東昏侯吁嗟弄兵兵以至楊左諸臣空望治讖成
委鬼與茄花劈正徒勞殿楹置想見經營費匠心藉娛長晝法
宮深太阿倒授佗人柄遂令神州歎陸沈大東小東縱尋斧讖
士吞聲狂豎舞走馬廷前督內操那惜金錢輸左府揮戈難返
日舍三寇鋒徧野民何堪六州鑄鐵真成錯事到桓靈不忍談

題宜興李氏三忠傳後

堯封萬郡隸山河螳臂何能尚執戈一綫趙孤留帝昃三禺漢
朔奉臣佗撫軍有地持殘節蹈海無人弔逝波歎息蒼黃身殉
國當年多少事銷磨

送崔亦園廣文之官華亭

風雨蕭齋共寂寥苔岑八載訂深交偶看秋水思鱸味自揀雲

山定鶴巢別正霜花飄鬢影到應梅蕊綻林梢問奇佗日容過
訪知已無心作解嘲

題觀生閣采芝仙畫幀

蓬萊雲氣空復空仙靈來往空濛中下有嶙峋礫石千疊之奇
石上有輪囷天矯百尺之長松仙之人兮方兩瞳荷衣蕙帶飄
天風不戴笠不支筇不跨白鶴不躡雲閒龍鬢頭奴子行相從
靈芝色勝紅芙蓉長生之藥採自蓬萊宮非赤松子便是商山
翁鬢眉未許塵世見偶因墨妙畱仙蹤玉堂風日不到處此福
知與仙靈同但願童顏鶴髮不改韶年容瑤池歲歲桃花紅

涼棚

清陰如水泥簾櫳虛納天光面面通高不礙花甯礙月疏難遮
雨況遮風無多一席追涼地大有千閒廣厦功閒就北窗消永

晝不知門外輭塵紅

人閒熱惱肯重經當午渾忘赤日停舒卷浮雲空際現蕭森涼
雨靜中聽不須團扇秋風逼已是孤篷客夢醒便脫朝衫歸戴
笠松毛香結水邊亭

七夕風雨感懷作

經秋重見尙非遙幾度經秋太寂寥天迴有蛛難綴網水深無
鵲可填橋自來方嶠圓壺地空負金風玉露宵不少飛昇攜眷
屬一般仙福雨般消

維揚分野望中遙兩度音塵界沈寥不爲牽牛甯織錦可堪司
馬枉題橋酸風細雨悲秋客香霧清輝拜月宵同是單衾擁無
寐便非靈夕也魂消

再疊前韻

一水中分路豈遙星期惆悵太寥寥何年得副乘槎使遠道來
尋賣卜橋歎女癡童無此恨天長地久有今宵仙靈易證貧難
逐償盡金錢怨始消

高攀華胄太遙遙癡絕真甘守寂寥不忿天孫畱織室可容仙
子覓藍橋三年遠道難爲客千里歸心結此宵富貴縱饒天上
有乞來還仗福能消

以敝衣寄家感作

衣敝已如此長途尙寄將遺簪與舊履無奈意難忘
中有思鄉淚和衣遠到家莫嫌狼藉甚多半是風沙
病念衰年母況逢霜降時兒身幸無恙冷暖自支持
庭長當歸草堂虛織錦機深秋又過也誰爲寄寒衣
不覺沈腰瘦日憎衣帶長何須遠相問尺寸自思量

重過嘉樹堂寄陳扶雅同年二首

嘉樹堂為族祖
文恪公別業

也識人生同傳舍重來無奈意留連
舉頭雲樹成千里彈指鴻泥隔五年
坐榻已遷堂左畔隣椿猶蔭屋東偏
佗時逕擬移尊過乞與閒窗半日眠

久坐心情餒不知茶餘重話主歸遲
起看庭樹曾相識歸撫楹書有所思
生客又勞呼此日故吾無改憶前時
煩君爲報余羣從千帙琳琅代護持

寄內子回回錦

鄭重題封附便帆到家休誤認朝衫
愛佗中有回回字千里歸心寄一函

回文錦質替卿裁繡就文重手寄來
我比連波心事別尙無專寵趙陽臺

碧漢紅牆水一涯
橋通烏鵲路非賒
如何自有天孫錦
轉索牛郎錦寄家

離家日遠信全稀
憶母遙瞻雁北飛
一疋胡威清白絹
寄家聊當老萊衣

作家書畢書示琳兒

前汝母書來中述汝嬰病坐臥爲不適
東望頻引領亦知汝母賢調護暇以整
而心終不釋此中係天性朝來理疏髮
霜雪添兩鬢側思吾母衰五載缺定省
冷官限資格省假未敢請母今念我心
我念汝可證何時得祿養令我顏色暹

秋闈分校呈同事諸公

難似羣公藻鑑才也充仙數上蓬萊
不愁五色全迷卻大要三生得結來
到此水仍分派進薦卷皆由內監試發學分呈偶然花亦換枝開劉指

迷可奈臨厓返好去魚龍自擇胎

羅漢分明聚此堂妙蓮花現佛中央擬程應讓老名士

汪莘山前號有程程詩

受聘都稱新嫁娘

其夫俱

評騭爲誰雙腕脫浮沈如我一莊荒有

人同日傳衣鉢早向靈峯主道場

那容花樣獨翻新逐逐邯鄲步後塵寶筏但通先覺路浮圖還待合尖人荆榛重墜防遺美燕石終捐怕混真八度秋風雨春雨故吾回憶尙酸辛

此中甘苦畧嘗過倍信師恩未可磨印月總期成果去迴風爭禁落花多天人漢殿惟三策經學唐賢各一科

初明經學究

不盡掄才

憑墨義悠悠斯論奈時何

試卷未來長晝無事書此遣悶

十年前日事棖觸意中來夜月三更燭秋霖四壁苔眼青逢郢

匠頭白上燕臺痛定還思痛酬知敢失才

送韓芸舫師之任浙東觀察

南歸無計逐行旌空羨湖山竹馬迎麾下編氓新子姓帳前雍

緒舊師生重三餞補蘭亭會第一才慚雁塔名若論師資最原

遠湖從星宿到蓬瀛

謝馬實庵
大夫子

宣武門西載酒來質疑經史乘淵裁青箱事業儒林傳赤棒風

威御史臺七度科名矜後輩

九重天語獎雄才使星東望明如月紅雨香中一棹開

挽高翁伯揚

詩

翁少作續琵琶傳靈鷲樵歌諸書綺語結習未足概翁生平善
行暮年以所積力行諸善發孤老病銜惠不少惜乎其力不足
以副所願然亦足媿居高位營美祿視斯人疾苦漠不關心者

矣丁卯歲敬銷假赴都拜謁於闔門市屢閒湫隘鷲塵無容足
地翁安之若素時以待同伴留數日朝夕枉過意思歉懇既解
維執手鄭重而別今秋兒子書來知翁遄歸道山不勝感惋以
翁善行身受者自能誌之故奉挽止及其逸事一則

吾翁年少何風流樂府解唱伊涼州吾翁年高樂爲善散盡家
財心不倦縮衣節食勉力行爲善如此非好名口碑在人且姑
置請爲吾翁談逸事愁風朔雪天黃昏有客雉經當翁門瞥然
見之心不驚摸尙微溫負而入從容療救竟再生其事險絕談
猶驚嗚呼趨避世誠巧意外災生誰自保翁今死矣翁善存哭
翁不爲婚翁門

書徐星伯同年眞定書院風動碑詩後

我昔校文羣玉府暇勸君吟辭以魯那知半面隱妝飾未許全

軍見旗鼓星郵昨遠寄詞翰風格居然效韓杜中言乘傳過鄉
邑向晚停驂憩村隴入門講席積埃璫眼照豐碑峙廊廡署題
國姓盛勲伐鏡刻王書含媚嫵相傳風動著靈異可笑言訛自
今古瀧岡阡表感蛟龍岫嶼山文制豺虎神誇瑞石篆文現嫗
惜羸牛鞭撻苦攝魂事怪誇李邕登峴詞哀感羊祜耳聞何如
目驗信儒癡每受鄉愚侮面謾成習我所嗤背誦不遺君可賭
知君課士具眞鑿感我讐書老元圃珠英往歲覽三教玉屑今
秋搜四部傳鈔十輩嗟腕脫校勘萬篇愁目瞽每逢難字心語
口欲補斷文指畫肚好奇未免售贗鼎積懈眞堪誚強弩劇憐
星繫比匏瓜濫厠雷鳴仍瓦甌年勞尙淺齒先邁月俸空糜事
何補旅懷引頸望秋翻鄉味垂涎憶春醪擬乘潞水挂蒲帆歸
倚吳山啟蓬戶和歌代簡寫似君寒夜詩成月當午

法梧門前輩邀城北招提看荷不果往

精藍無塵人跡少有約看花過清早勞生笑我眼福慳竟把清
游負詩老解嘲一語聊自慰深恐無詩被花惱催詩豈料如索
逋一宿吟筒寄新草花香酒氣紙上浮想見當筵筆橫埽陳君
未免金粉氣誇詡明妝擊翠葆謂年來參得賈島禪三昧此中
心自了白蘋風裏動鄉思我本江湖一鷗鳥花閒載酒記舊游
醉後狂歌音嫋嫋當時此樂不自惜謂可百年長共保祇今追
憶一悽然勝境何年續幽討詩成夢到六橋邊一柳蟬吟秋露
飽

題梧門前輩玉延秋館圖卽次湖畔曉行元韻

東坡先生乏賒願暇煮芋羹炊鼎飯飯餘一飽自忻然只有尋
詩腰腳健小西厓室萬本書出門代足惟疲驢浮雲世事不挂

眼混跡久已同樵漁涼風颺颺碧梧落玉延滿庭雜藜藿銀河
千斛洗眼明默坐讐書埽秋籟有時笠子風前歆卻入古寺尋
殘碑千秋公繼原博跡七字我媿茶陵詩

陳小孟移居

陳君居京歲無幾官未一遷屋五徙東珠市口記初來住未數
旬行徙矣從此薄策車忙殺載行李顛簸無完形貽害到牀几
案頭百本書有首半缺尾或僦居精藍或寄食會邸或風雨僅
遮或輪奐特起春來秋去等梁燕暖就冷遷同穴蟻問君胡以
然君言有錢則豪無則已昨來告我貧面色愁不喜賣車復賣
屋二者費商擬室中倘有柳枝存任達還應樂天比長鬢已去
小史畱決計移家內城裏還招我輩爲落成餉以春醪侑之鯉
我知君清貧貧未入骨髓我貧今勝君萬事付不理遮頭自笑

寸椽無一室埽除心久鄙願君心平室卽寬作歌贈君慚句俚
得家書

本無言藉報平安喜懼關心閱暑寒沈攔夢猶勞佇望到來函
轉怕開看慈親老境歡娛少歉歲貧家料理難寄語阿連須努
力好承顏色勉加餐

恩賞哈密瓜恭紀

苜蓿蒲桃陋漢唐

聖朝萬里關回疆紫駟遠遞來邊塞黃帕高擎出尙方

恩重

小臣

何幸及路遙慈母未能嘗獨餘懷核

君前意寄植萱庭答

寵光

題陳鍾溪前輩書贊圖卽用原韻

龍門高啟萬壑趨學海至海爭歸墟兼容并包大小俱濫吹未
肯收齊竽先生博物識罇于雄辨寶鼎出宛胸紉紅許綠勤補
苴筆穎禿盡尖頭奴採風奉使無歲無羔生雉死百不需歸裘
頗驚歷後車關津有稅不到書耽書幾人窮奧區貧憐編緝柳
與蒲豈如祕文窺石渠青藜熊熊輝座隅賡除祕辛難見誣赤
水那復遺元珠還從沙礫覓瑤瑜自來善本藏桑樞一編價或
兼金逾校讐精不差毫銖通靈飛怕顧愷厨朝回坐守過三晡
憶陪結網搜珊瑚得瞻道貌清而腴庚午余分校直隸
鄉闈公爲主試力回茁軋追典
謨如焚林獵竭澤漁照乘不許目混魚我慚通籍承明廬故鄉
輞川空畫圖依人六載守故株腹儉隔宿春無儲枉占福地瑯
嬛居幼學悔不攻三餘可堪老大仍顛愚笑祝滿篝操一盂願
借下牀充鈔胥陸莊不荒爲課租大江南北年年輸

詩勉琳兒兼示璵琪諸姪二首

汝生惜已晚，汝祖身早殂。汝祖三弟昆，其二嗣各無。祖生六男，
兒生女數，亦符排行。我當六姊弟，相連呼不及。見三兄先我，荆
枝枯有姊，適良人。兩載歸黃墟，次早嬰瘵亡。伶俜八載餘，一妹
殤觸熱，身未離乳哺。有弟貌翩翩，丹脣白雪膚。儀容肖汝祖，僉
謂汗血駒。不幸遊沈疾，藥籙窮醫巫。今祇兩人在，相倚蚤駟如。
豈無汝三姑，出嫁從人趨。單寒歎門祚，親戚相挪斂。所願汝輩
賢，能讀汝祖書。我生無德澤，我積無膏腴。田是汝祖耕，屋是汝
祖居。汝祖多善行，十百難盡臚。惠愛徧戚里，結交多通儒。水流
有本源，木生有根株。根源旣已盛，芘蔭乃及余。繫余乘薄植，少
小何顛愚。汝祖量其材，教誨加勤劬。功名雖未達，願望良匪虛。
儼然掇巍科，儼然充直廬。後起望汝輩，高大吾門閭。勿謂髮未

燥勿謂齒尙雛轉眼十年閒巍然五丈夫卽不皆讀書士農執
一途庶幾汝祖母老境心歡娛

汝上有耶孃汝下有婢僕耶孃望汝成婢僕供汝役護汝衣有
縣餐汝盤有肉既不苦饑寒亦且承鞠育雖異貴家兒亦擅中
人福及此少年時好把羣書讀讀書不厭多讀書不厭熟書多
用隨心書熟藏在腹慎勿字牽連慎勿句斷續須存專一心慎
勿游爾目須學馴謹狀慎勿搖爾足須生歡喜心慎勿聲帶哭
書中有詞華如錦繡珠玉書中有理解如布帛菽粟理解要貫
通詞華要聯屬汝但就師問師不嫌汝瀆我家本清貧日用乏
旨蓄棲身祇一椽插架但千軸何能出高嘗爲汝營美祿汝若
不讀書終竟下流辱汝若不讀書終竟衡茆伏讀之有收成譬
彼農播穀讀之有裁取譬彼工擇木穀資灌溉勤木仗斧斤斲

力田乃逢年伐山自成屋此義如了了此身不碌碌春秋一瞬
過日月雙丸逐分陰貴自惜寸晷苦不足寒齋月三更寄汝詩
一幅以此爲座銘芸窗日三復

管夫人硯歌爲英煦齋師作

雲映一片玲瓏裁重村累夢芙蓉開花花相當葉葉對巧製出
自璇機才蘭閣當日想鄭重棊几位置無纖埃暇拈毫素寫墨
竹風枝露葉千竿栽古香淋漓沁芳澤玉質不許風塵埋吾師
墨妙繼文敏雙鈞名帖收羅賅臨撫寶此若拱壁回視餘石皆
凡材流傳閱世七百載遭遇松雪方歸來卻笑塗鴉門下士學
書未敢稱重臺

春草和劉信芳師韻

春來依舊滿芳郊百種千名數最清臨水色妍貪露瀉藉花香

薄妬風捎簾垂陋室餘琴弄門掩荒蕪罷客敲何處吟懷易棖
觸萬重山翠一鞭梢

欲溯前塵境已迷舊游回首悵鴻泥黏天有色撩鶯眼跑地無
聲撒馬蹏晴挂一筇看夕照雨拖雙屐訪雲棲而今南望春暉
遠孤負明湖水拍隄

垂青知定幾人憐有約癡尋陌上鈿是色是空還是夢如袍如
扇復如煙愁牽遠道傷心別鬪想深閨樂事偏容易秋風吹便
老荷重披拂已經年

亂紅飛盡一庭花催長星星惱鬢華魂已黯銷停賦筆居仍不
易媿詩家浮蹤舊雨聯今雨新恨山涯更水涯欲採蕪菁奈綠
淺天台重到但雲霞

春草重和前韻

慈母吟成感孟郊客愁如蔓理還滄浮生喜託風光轉小劫驚
逢急雨捎妙舞邯鄲裙幄展悲歌勅勒劍鐔敲隔叢飛羨雙黃
蝶已附青蘿上碧梢

飛絮游絲到眼迷出山心事笑霑泥風前盡日搔蓬鬢陌上何
人試駿蹶又是暮春三月過可憐浮世一塵棲無私也識東皇
意爭奈情傷對大隄

晚晴天果意垂憐半老猶容整翠鈿拚卻此心寒抱雨怕仍經
眼亂隨煙六朝金粉春無賴三徑蓬萊地最偏商畧吾廬結河
畔芸香相對過中年

豈竟無名讓衆花獨先搖落怨芳華已隨紅雨埋香徑且解青
袍付酒家憶弟西堂成斷夢送人南浦是生涯寸根好護休狼
藉畱待秋芳映暮霞

買芍藥

數椽屋尙賃無貲欲貯嬌真笑我癡繩束可憐同菜把火攻無
賴到花枝東風十里揚州郭太守三春夜讌時勝否豐臺好聲
價一錢輸已看西施

次孫平叔同年偕王玉章崇效寺看牡丹韻

平生百醜無一好風沙六載長安道相對叢殘百本書嬾又輸
君勤探討陌頭幾日喧游車章綬照耀騶從謹知君此時意無
賴閒招吟伴過僧家聞道花開朵盈百裁翦天公費刀尺何人
相賞未開時花亦乘時逞顏色蘭幽梅冷桃杏繁海棠醉騰嬌
春衫獨將九錫頌姚魏投時君未心超凡一夜顛風捲花瓣欲
約重游怕空返莫增招悵對芳菲尚有芙蓉照秋晚百年歲月
過堂堂吳淞味戀莼鱸香好春時候不歸去花應冷笑詩人忙

戲更爲君作轉語拚卻春風一場舞世閒萬事那可期會見紗籠舊題句

遣懷次平叔韻

惜春詩寫雁頭箋蕭瑟情懷中酒天花信甘番過小劫霓裳一曲殿羣仙尚畱銜附諸公後從此貧如未第前時以大考三等齋保呼吸險隨風引去得還難似呂梁川

才謝坡仙百派新敢言磨蝎是生辰卽教紫菊能延歲可怕黃楊再厄春科目漸居前輩行辦香深負受人祇餘瘦骨峻嶒在恥逐脂韋拜後塵

年來心已類秋蓬巧樣輸人製錦工奏賦有才誇倚馬逢場無技媿雕蟲青衫雪涕情如昨白髮泥金望又空多謝故交書慰藉更拈何說解揚雄

小園修竹萬竿斜西子湖頭我舊家
途若竟窮身可退仙原難學鬢空華
出山遠志翻成草墮溷繁香在作花
且對風光慰寥寂雨餘新綠滿簷牙

秋日平叔招飲爛醉賦此

蕭齋冷几流秋螢敗紙獵獵風吹櫺牀頭
酒盡雙玉餅夜眠目作鰈魚醒持螯有約
孫過庭折簡不待招丁嗔陳侯院僻同郊
坳冷官款客門罷局西風雙柳搖疏青入戶
先許窺娉婷時登紫雲金瓶犯令不怕金吾聽飲非文字非優伶
詼諧主客皆忘形疾呼酒來杯不停黃團手
剝十指腥酒邊鄉味懷沙汀我家潮汝看東
溟長江繞郭山圍屏拍浮一葉乘吳艫爬沙
束以秋稻莖年來斯樂墮杳冥勞擾擾風中
萍掃愁仗君沽醪醕相看兩鬢同星星腰圍
幾時纏萬釘蒲柳姿恐先秋零君胡不歸曲
水亭惠

山泉味同中冷無錢誓墓亦不靈姑逃醉鄉眼暫暝誰爲蝶羸
誰螟蛉兩耳寂不聞雷霆飲君酒功勝參苓歸來夜讀楞嚴經
仰視北斗光熒熒

京居貧甚偶閱小倉山房詠錢之作戲和之

夢穢如占果得財執鞭吾亦效輿臺腰纏有客凌雲去耳語何
人使酒來錄並雲疊饒古色製隨時代擅通才爲刀爲布爲榆
莢見總軒渠笑口開

解執牙籌到夜徂本流雖大計甯粗能豪也恃看囊有行樂其
如拄杖無萬貫吏感神作祟七襄天責女償逋年來底事成疏
闊祇恐家兄尚錯呼

丙函方更外圓通面面磨梭眼脫空無可療從成癖後最難忘
在不言中選非廉吏居然大數到寒閨定不工世上萬般誰傲

得只除明月與清風

潤筆無資已久甘雇山有願總虛談金編埒滿官皆愛紙作灰
飛鬼亦貪市上倘多成善賈帳中如撒定宜男火珠林卜何勞
問世態年來我漸諳

題嚴鷗民文選樓校書圖

瑯嬛仙館集羣英都講如公最有聲漢學緒承通德里蕭樓勝
攬廣陵城江光山色登臨好蟬影芸香點勘精我忝三年同館
職問奇仍是舊諸生

雪刺年來已滿頭欲攜書策載歸舟卻招南國無雙士重上西
湖第一樓鄉味祇今勞夢想禮堂何日定身游披圖師友情懷
繫珍重蕭齋數月留

董小櫺秋燈對讀圖

夜色黯黯溪雲橫風聲策策庭梧鳴短檠相對聽秋雨知君此
日心和平黃蒿離離長屋瓦白月紛紛墮霜野短檠聽雨境依
然此日知君淚盈把把雨雨風風年復年舊書重理短檠前丹
鉛展看新脫手往境一失隨飛煙十年夢斷江南路大好溪山
隔雲樹頭白佗時歸去來忍見空堂讀書處我亦鴿原感舊愁
數椽茆屋曲江頭篝燈夜讀借予季遺卷塵埋幾度秋輸君兄
弟知名早花戀同枝開總好欲助詩才晤阿連池塘此地春無
草旅舍年來借一枝京華冠蓋笑書癡披圖我欲同君哭又是
秋風秋雨時

癸酉九月十五日紀事

軍容弛備太平朝紫禁迴翔集百僚雲罕星旂方問俗城狐社
鼠遽興妖雷霆奮擊神威著矛戟紛攢士氣驍一夕風聲兼鶴

一
二
三
四
五
六
七
八
九
十
十一
十二
十三
十四
十五
十六
十七
十八
十九
二十
二十一
二十二
二十三
二十四
二十五
二十六
二十七
二十八
二十九
三十
三十一
三十二
三十三
三十四
三十五
三十六
三十七
三十八
三十九
四十
四十一
四十二
四十三
四十四
四十五
四十六
四十七
四十八
四十九
五十
五十一
五十二
五十三
五十四
五十五
五十六
五十七
五十八
五十九
六十
六十一
六十二
六十三
六十四
六十五
六十六
六十七
六十八
六十九
七十
七十一
七十二
七十三
七十四
七十五
七十六
七十七
七十八
七十九
八十
八十一
八十二
八十三
八十四
八十五
八十六
八十七
八十八
八十九
九十
九十一
九十二
九十三
九十四
九十五
九十六
九十七
九十八
九十九
一百

嘖萬家無寐坐通宵

斧螳鋒蝟自戕身梗化非關化未醇
檣杌現形堯盛世鯨鯢就戮冀頑民
已聞寬大頒明詔好答昇平在重臣
卻憶五人同日

死清宵無那淚霑巾

林清滋事日文
穎館死者五人

送平叔之官閩中

國家歲舉賢爲選爲俊造文章及經義
投贊等紵縞男兒重策勲華國豈云報
君才負幹濟學況窮閭奧沿流能討源
筆力自排算藏書十萬卷外更無一好
卽此概生平澹泊見貞操知君未識面
江左名久噪暨聯同岑契榮落互慰勞
祕文校石渠我視若昏眊仗君眼如月
落葉千萬埽零縑與斷簡珍重比圭璋
所難奄衆長歛退絕矜躁緬懷涉世險
冰炭閱涼燠固窮事分定競進衆所媚
疏慵我自審林壑慕高蹈野鶴翩雖全
姿異鳳

豚菴煌煌公卿闈欲謁愁倨傲安得千仞岡塵埋沆雪瀑望雲
憶慈母髮白年近耄計營升斗祿恐亦成悔懊功名與著述夢
想兩不到君今赴八閩隄路河準漕家山盼九龍到暫駐旌纛
我居較君里一水接厓隩過浙見阿連幸以無恙告側聞甌脫
地郡半瀕海澳漳泉結世仇慣鬪俗桀驁殺人不抵法急則起
爲盜草薶禽獮之何啻暴易暴願君本儒術法外以德導秋霜
自云嚴功讓春雨膏南方地卑溼入夏民歎澇環渠設堰牯啟
閉審羸耗備荒先積儲征課戒其冒廉能飭庶僚是在上所號
安民先察吏

天語垂典詰政績劭前芬我輩心竊禱還因簿書暇史帙編李

嘉

君時方在
南北

書成肯寄示絕勝八珍犒攬時月嘉平風景偈祭竈送

君喜無寐離索心轉悼何年返鄉國家食屢溪芼蒺君旌節臨

同醉側烏帽

隣有老女適人者爲代賦此

禮數從新學就無莫仍生性女兒癡羞顏紅毯低頭拜喜色青
衣拍手呼稍失檢持成蕩婦最難調奉是嚴姑不如總髻拋環
鈿長守寒闈自辟纊

底須百兩迓盈門梅標時過不禁奔脣舌耿耿新娣似饑寒粥
粥小雞豚可投此去狂奴意翻戀從前阿母恩多少癩仙動凡
想沈迷人海苦難論

題壯烈伯李忠毅公傳後

自是天生大將才十年金鼓震蓬萊無援竟使孫恩在有讖先
驚岳鄂來雉尾照波千艦燼虎牙垂涕一軍哀長鯨戮盡騎鯨
去突兀崇祠面海開

消得勲封五等優險衝鯨浪拔龍湫卽看星向營前落已報兵
從海上收笑指滄波爲馬革誓忘歸計到菟裘讀公羽檄思公
狀奕奕英風腕底留

辛未歲蔡瑛師見贈忠毅
手書所述皆會議剿捕事

挽汪醉白

四海中推早訂交弱齡燈火共衡茅家隣嚴瀨新流寓

君爲嚴州建
德人徙錢唐

甫兩世經訪孫簾遠就交

年十四隨余家同受
經於孫青崖夫子

畫筆讓君饒嫵媚詩才同我

費推敲篇題笠澤邀遊和圖寫荆關悔浪拋

晉畫得筆法
於錢文獻生

一榻凝塵

翹靜鷺

性喜翫書畫日
時坐無俗客千番顛草舞狂蛟

五六分兼
應行草

起乘珠露明花當眠

待銀蟾上柳梢偶亦論文成抵牾或因評古雜談啁飛揚意氣

容山簡通脫情懷愛石苞晨夕不離印負屨苔岑相契漆投膠

沈思往事驚彈指卻數華年感幻泡及見風流諸老輩每談文

字啟中庖才如鄭監題三絕飲有劉伶賦載嗽曾共問奇參末

論得陪高讌飫嘉肴

先君子與里中諸名宿文酒之會月
恒四五君與余皆侍側得聞緒餘

雨中尋菡過荒徑

雪後探梅出近郊看竹村深名記梵種桃山小姓傳包

包家山
多桃花

循曲港窺魚戲爲酌甘泉訪虎跑卽景流連裳互踣學吟辛苦

硯成劫光陰逝水歡難再聚散搏沙會易淆一自雪泥畱日下

屢驚塵堞撲鞭鞘舊游零落悲聞笛薄宦淹畱等繫匏似爾枯

魚仍臥轍羨佗野鶴不離巢何圖做帝心同享肯寄新縑手自

鈔

前年嘗因
寄詩冊之
字序之

鸞鳳嘯符孫氏旨羔羊味勝黨家魚仙心長吉囊

中探鳥爪麻姑背上抓逸興煙霞成痼癖清音山水絕哇咬重

開遺卷香消蠹轉憶平生淚瀉鮫債欠未償呼負負數奇不偶

歎嚶嚶窮途未許霑升秩志大何堪混斗筭一夕鳧飛歸岱籙

千秋漁隱冷溪茭紅香夢斷重三節

三月間
得君耗

白賁占來上九交拜

後可酬東野願

與君別時
尚稟有字

歸遲爭免北山嘲話離翦燭成虛約愁臥

窗聞急雨捎

平叔出都時畱一僮一犬與余僮名興兒犬名黑子今興兒以余貧辭去而黑子甚馴書簡平叔

劇憐操作等勞薪辭我休疑我意嗔本未有恩甯責汝果然無欲肯依人清貧能耐誠難事門戶重投也爲身寄語汀州賢太守不關僮約過艱辛

深巷彎環別一村窮居全仗爾司昏乞憐狀類奴新聘寄養心知主舊恩得食自甘隨老婢託身何苦定豪門不多長物勞相護坐有青氈一片存

紀侯編鐘歌爲劉燕庭作

朔風凌厲途揚沙訪古文過韋平家編鐘示我三代物縣以雕虞盤青綯爲鉦爲鼓合鳧氏旋蟲綴甬環微斜蒼然古意絕緣

飾堅粹不許苔生花何年製成未考擊隧當擗處隆不窪叩之
清越應何律十二中豈黷賓耶銘文有六見於銑已侯字畫完
無瑕侯名伊何苦難辨問奇我欲同侯芭裂繻子帛果何是三
傳同異紛爭諱可憐吾友嗜金石世謂猶篆滿紙塗龍蛇眼前一
字竟不識瞪視張口徒衙衙就中何郎特狡獪凡將置不窮搜
爬公然證紀古作已以便放筆揚詞葩矧余評古值面謾鉛刀
寶卽同鑊鈇那能強解出新意從衆而繆非吾差吾聞紀乃齊
所滅封國地本隣琅琊齊諸罇鐘想親見博古圖載周時鐘有銘著
凡十七而齊鐘居其六效尤
作此相矜夸器精國小衆所媚莒槃卽鼎遭兵加又聞紀季以
鄙入請後五廟詞堪嗟廟中物數祭器最安忍委棄淪天涯抱
歸於齊保世世豪奪不畏齊驕奢不然齊賂晉紀甌此鐘胡勿
隨輜車青陽華胄黃帝後恃此鐘以流傳賒祇今胸劇舊名在

更無人種青門瓜存亡千載一髮繫天肯毀使長韜華瑩然重
入好古手物不惟有惟其嘉想當柴几終日對餘物到眼如雲
霞黃鍾好配荀勗鐸催令僵木生萌芽

太平鼓

太平鼓鼓太平錚錚縱縱無定聲白雨點急環齊鳴鐵作環皮
作面隻手擎來月一片團團手中月如月妻兒圓不缺雙雙杪
上環如環身不離鄉關刀環有曲且停唱打到元宵明月上明
月飛上天但願循環如此年復年大兒月下掀且舞小兒攀環
手雙拊一聲聲帶太平來笑煞離婁答臘唐家鼓

苦寒

苦寒難耐思炎蒸人閒果誰真愛憎爐剛熾炭已灰燼唾未墮
地先冰凝空林噪雪但聞雀破壁鑽紙全無蠅薑芽斂手藉藏

拙呵凍作書辭不能

春勝

綵簇一枝新千門萬戶春與年增勝事此日信宜人柏酒傾三
雅椒盤薦五辛客居懷節物康健祝慈親

晚香玉歌

晚香玉向晚揚芳馨葉紛如蒲穗如粟素英繁朵跗含青誰家
紅紫固金屏標格共詫尹與邢熏爐夕張霧噴薄篆燭夜燒光
瓏璣不如此花態妙婷珊珊玉骨天賦形風前吹馥自脉脉月
下弄影還亭亭明河西斜露欲零暗叢照豔惟流螢可眞病解
馬卿渴已覺酒報劉伶醒聘錢何必輸萬釘金屋貯以雙銅餅
逕當喚汝作燕玉插鬢其奈饒繁星

賜橘恭紀

朱實耀霜明南方貢篚呈踰淮甯異性錫福有嘉名幼憶兒懷
日恩叨

帝賜榮開緘三百顆香色尚如生

陳受笙行腳看山圖

我生與名山心契苦緣薄九載寓春明慚媿此腰腳打包羨君
游萬里兩芒屨新詩昨寫似琢句峯秀削山中多篆刻一一手
摹拓山中足煙霞一一手揮霍載諸書畫舫補以金石畧看山
有如此不負腳親著朝來忽語我舊習擬屏卻歸去曲江湄結
搆小邱壑中起看山樓手把香茆縛臥游於其閒此意良不惡
譬如行腳僧飛錫徧崖嶒蒲團忽面壁重以十年約祇愁造物
笑君願太遼靡勞我者以生何地得閒樂側聞吾鄉饑蔬食缺
藜藿可憐二三友生計何寂寞書來訴沿門有跡無處託飽餐

太倉粟逾分毋乃作客中近清明微雨潤花萼期君一尊酒花
下共斟酌君看此庭花風際自開落萬事付自然此解君請索

閣立本畫蕭翼賺蘭亭圖

永欣寺門裏鐵葉蘭亭世傳等衣鉢苦愛成魔老辨才虔恃佛
梁高突兀再三天子下詔求東南到處窮冥搜道場徵入際不

語豪奪既難因巧偷箝書昔讀延之紀此舉深疑近兒戲全唐文所收何

延之記敘蕭翼
蘭亭事甚詳卻看閣令與同時寫入丹青狀無異辨才捉麈對客

談侍者拳縮絕類已蘭將蛾蠶其二淪茗一髻一髮垂盪鬢客

何龍鍾被黃衫登來齊語彷彿聲誦誦瘦樽不在手已飲過缸

面酒畫叉手又無已卷還職貢圖客容足恭態機變似畫蘭亭

眼初見魔登欲攝清淨身故肆擲撇待乘便彈琴握槩客盡能

我為辨才亦不憎一朝傳呼口稱勅事後言之尙驚絕始何珍

弄終慢藏餘寶亦其蘭亭亡同時何遽入圖畫得無詔寫由文
皇嗚呼薦雖得人賞終濫過眼雲煙聚還散佗時玉匣出人閒
暗檻昭陵同一歎

龔翠巖洪崖先生出游圖

不住杓常盈壺乘游市塵雪雪驢洪崖先生一酒徒五帝圖三
禮注易先京房作章句洪崖先生一儒素太常卿歷司徒尊酒
徒儒素作貴人不知當日巢許輩曾否屈節爲堯臣紅蕉葛衫
襪臻巾叩杖九節高過身終南太華山嶙峋暫爲貴人仍隱淪
栗擔而從荷耆木長安塵多障有橋鞭驢疾行葛與咄大隱何
如小隱高我心久在煙霞窟先生蹟著開元年君王學佛還求
仙元奘身到釋迦處張果生自羲皇前史傳似此誰芟鐫況乃
紕繆存裨篇此其有無安足校何人親拍洪崖肩翠巖能詩精

篆隸餘事丹青稱絕藝得無居士自寫真中寓柴桑避秦意畫
師闕令曾爲圖誰歟跋者玉局蘇後來錢選亦仿此知與此圖
神似無君不見唐代求仙崇老氏附鳳攀龍更餘子絹素流傳
五百年先生藉圖長不死

閣立本鎖諫圖

遮須夷王冒頓聰媼會逸出胎毒龍旣營徽光斬將作鷄儀又
起深宮中逍遙游讌廷尉從運來哭人聲殷空以身鎖樹驟難
掣攀檻欲繼朱雲蹤劉娥婉婉饒父風章奏代決書能通停刑
密勅聰左右手疏請死詞由衷片言已折凶豎凶媿賢媿汝非
臣工雖然廷尉實強項月光之黜伊誰功佗時鑒等禍獨鍾密
勅不聞傳後宮令人卻憶后容諫豈真抱樹能逃鋒開圖陡覺
塵沙蒙面目似此難形容虬髯者聰手按膝赭黃袍底雙鞵紅

猙獰甲士戈鋌擬紫衣扶服兩蟻蠓君臣怪醜盡一狀藥叉環
侍閭浮雄翩何來遲圖且窮清揚有美翔驚鴻迴觀彼衆豈人
類如業海現青芙蓉吁嗟畫師果教忠曷不貌古關龍逢我知
殷鑒寓深意納誨爾時推太宗會須殺此田舍翁倖免與此將
毋同不須禁樹人爭譽進諫重圖魏鄭公

米元章自書吳江舟中詩卷

我從石渠探寶笈獲見米老舟行詩米老書畫人知之其詩佚
倫或不知此詩實奇絕險韻隨手施或捷如轉圜或輕如游絲
就中沈鬱風雲馳想見興酣落筆淋漓時春蛇秋蚓我自嗤以
評公書無乃癡解嘲借坡老論書及箭兼及人妍媸怒猊渴驥
空搆形似辭以詩論書坡老真吾師

宋徽宗聽琴圖

松風一曲韻生哀
拂拂胡沙繞指來
如此宮商聽不悟
可憐孤負好桐材

崇雅堂詩鈔卷六

仁和 胡敬 以莊

恭和

御製重華宮茶宴聯句元韻

縹緗美萃晉唐前珠玉千番續舊編垂露懸針書造古模山范
水筆餘妍品題不爽邀

眞鑿

制作長新握化權冊卷軸看重纂輯聞韶丹陛錫華筵
珠採隨和玉採璠古今名蹟富收存因文見道昭

宸訓正筆由心仰

聖言始信儲藏宏策府又看聞見廣詞園昇平盛事芳華節喜
起虞歌協泰元

恭和

御製上元燈詞元韻

節屆傳柑舊典承蓬山宵燕萬枝燈大圓鏡現琉璃界鶴馘蟠
膏五色騰

班聯鵲鸞首屏藩尺五親聆

黼座言中外一家

恩一體綏懷道握治平原

魚龍曼衍紛無數角觝先是訓習勤蕃樂乍停仙樂奏雲璈聲
在九霄聞

露華凝樹藻浮川

紫籟乘韶淑氣宣瑞鏡中央呈舞字萬年春景太平年

綵棚千尺銀花燦瓔珞流蘇綴百層地上華燈天上月高低香

霽瑞煙凝

萬方昨歲豐盈慶又兆來年入好春
今夜鳳城燈似海飲醇歌
德有堯民

蓮炬光中

御輦回尙聞吉爆殷如雷羽林傳放

丹墀仗歸騎無煩玉漏催

家法森嚴

帝恪循星橋火樹敢誇陳祇慚

恩渥邀非分又許隨看闔苑春

恭和

御製喜雨元韻

正是三農望澤時連宵好雨快深滋
流觴屆節清漪展

秉耒先期渥澍施漑麥村村香餅餌霑桑戶戶理機絲屢豐大有天垂貺蔀屋騰歡祝

帝禧

湯陰岳忠武王祠

故鄉猶得葬衣冠二帝魂難返寢園功邁韓劉推蓋代氣分河嶽壯中原將杭作汴真成錯爲國忘家竟被冤國爾忘家宋思陵與王勅中語遙望樓霞山水千秋流恨響潺湲

邯鄲盧生祠

魏爲西魏漢制府所建

道走邯鄲步暫停琳宮游徧第三廳祠分三重前像設爲鍾離仙中爲呂仙後爲盧生作臥狀漢唐師弟緣重聚土木形骸夢可醒梁到宦成猶未熟枕非仙授總無靈笑余觸熱行匆遽也抵塵凡一度經

淇水

俯鑒極清漣，澗不染煙漸。車凌曉渡，佩玉想風前。籊籊釣無
竹湯湯，流有泉。先人舊游處，遺詠記當年。

老母以鄉味二種見寄敬賦

筍乾

此是家山味，開籠仔細看。

宋人詩龍城
盤筍儼新題

班聯身老大，音信母平安。對

乍寬鄉思，閒堪佐食單。齏鹽生世累，風骨此君寒。園想芳林啟

春，逢綺序，闌滿畦。攢戢戢，和露刷珊瑚。僧衲風吹脫，兒紉日曬

乾。火攻非下策，雷起便高竿。版削膚凝玉，堪烘氣蘊蘭。已備溪

茗焙，還共野蔬攤。細箬圍干把，圓筠貯一簞。高堂憐作客，遠道

昂加餐。意恐清臞甚，材知造就難。分甘因芍藥，論價比琅玕。配

以蕪萹粥，登之苜蓿盤。枯禪參酒後，舊侶盼雲端。幸免形骸俗，

憑消臭味酸。殘編同稗販，佳節負團欒。聚籊編芒屨，裁皮製小

冠春暉戀慈竹飛夢到層巒

魚鬆

政爾歌長缺貧驩願竟從歸心秋後結鄉品客邊逢黃滲金干
點青包筋一重似鯖爭愛惜如鮓轉題封膏潤看黏箸霜飛想
運鋒碎來鸞比鹿甘甚醢猶龍薄易鱗紋削纖難骨鯁容入油
酥較膩成糝粉輸鬆腥待投薑辣腴宜沃酒醲調和鹽豉配收
斂醋芹供鮮帶桃花浪香凝竹葉鍾肥羶厭北產縷切憶南饗
膾總思鱸味鮓真屬菜備昔人以鮓菜爲總稱原舉之食止三
非任防謂每食鮓菜有二十七種書愁沈隔歲
冰擬臥凌冬妄念消緣木生涯等寄春釣游懷故里夔屈歎浮
蹤河欲帆開潞江因權達淞羹香嘗宋嫂漁具理吳儂甘旨頻
年缺煙波寄興濃一槭隨尺素線認手親縫

觀生閣蟠桃

駐顏何必藉丹砂，點染新陰滿絳紗。
乞取核歸堂北種，三千年後再開花。

送陳石琴同年南歸卽席成四疊韻

登

漫言扶病類維摩，萬里輪蹄憶昔過。
雲棧百盤攀鳥道，花田千頃按蠻歌。
江山勝境探來徧，風月閒情老去何。
歸定傳經心事慰，才人得子暮年多。

蠹乾螢冷事編摩，彈指春明十載過。
楓葉吳江秋後夢，杏花燕市酒邊歌。
送人作郡情難已，老我爲郎意若何。
何似西風歸棹穩，徐淮南去好山多。

明武宗豹房銅牌歌

葬

牌二面爲海昌吳兔牀先生所藏，同邑蔡茂才逸史爲作歌，刊集中。頃來都以集見贈，讀之覺形製宛在目前。考明洪武時造。

有用寶金牌以之調軍又飛龍麒麟上鐫十二字鐵牌以之詣番市馬又雙龍伏虎獨雲龍獨虎素雲上鐫二十四字金銀牌又獨龍伏虎獬豸獅子俱蟠雲花分仁義禮智信上鐫二十七字金塗銅牌均公侯都督下至千百戶依品秩佩之又申字及木金火水土字銅牌又承字及東西北字銅牌均金吾衛指揮千戶及兵馬指揮按所巡各門佩之又勇字銅牌以給守衛軍等又雙魚銅牌以給錦衣校尉等其大畧也據詩所述無龍虎諸製而鐫有年號姓名按明制惟頒外國符牌遇改元例更鑄年號換給然亦不列姓名此牌所用未知何屬史稱籍沒劉瑾家獲穿宮牌五百其式不詳則牌製之畱傳載記者固多漏畧矣兔牀定爲武宗豹房舊物要自有據今仍其說並次逸史韻以酬雅意倘佻口獲見當舉兩人詩以印證焉

武宗之朝軍政改遼延宣大新營屯軍中給牌比符節明明祖
制高皇存厥初施設示神武詎料玩弄娛童昏雲蟠已失伏虎
狀縑貫復缺雙魚痕冶銅製與守衛合范金秩異公侯尊周廬
十萬卒懸帶穿宮五百閤侵吞濫同旛蓋委佛利召令豺虎司
天闔大三營盡舊章替外四家乃邊兵掄盤游鷹飛雜狗走角
觝豕突還狼奔翦翎插帽態軒翥鋪花列幄光紛縕冰霜冬巡
骨耐冷煙火宵燕灰飛溫天雷將才有李愬朝恣藩孽同王敦
渡瀘竟擬縱敵逝乘駟幸免將公掀玉簪千里赴要約畫舸五
色憎迷惛豈無臺諫進忠讜可奈寺嬖工排報九邊自賜西北
履八駿重躡東南坤危乎沈魄汨羅水憊矣入蹕春明門見內府所
藏武宗出警入蹕二圖廣各八丈有奇出警圖畫帝戎
服乘馬入蹕圖畫帝龍袞御舟羽林仗飛鹵簿林列中涓禍不鑿乃祖內操弊
又貽而孫當時佩者定何輩猛士得此誇承恩自從供頓滿江

介遂使散落埋山垠漫矜鐫獅與鏤豸卻仗阻業兼吞磨年深
那免土花蝕製古欲共雲蠱捫把看兩道篆文字發想萬戶驚
心魂虎頭朱頰既殊式鹿角漢挂難同論既殊式難同論兔牀
寶此亦奚取不如錦裾雅辨令我酒足空千罇

秘篇諸作辭
今刊本從之

蔡全唐文時嘗得兔牀
先生笠澤叢書其記錦

題魏丈春松河渚讀書堂圖

先生家河渚讀書顏其堂想象畫圖中插架霏芸香甲科膺壯
歲學富推曹倉績最白雲司出守資才長當時觀

黼展

天語承褒揚是讀書人家

恩遇誌不忘維揚衝要地吏習多矜張治以所讀書鎮靜俾翼
黃繡衣再奉使漕運兼河防施設總裕如法自書中詳竭來返

故園老屋仍柴桑佳兒手書課夜讀聲琅琅一爲嶺南游干詩
壓歸裝嶺南多才士爭就弟子行奉職還春明白首猶爲郎先
生顧之喜夙願今可償紫藤屋三閤書冊堆盈牀庭闕足佳卉
頗不殊江鄉小米試補圓墨妙追元章

詞吳西園

種花

閒庭雜羣卉顏色何依依幾日秋漸深葉脫花全稀微雨灑然
過著眼增芳菲乃知秋氣肅中亦含生機我生過中年失學佗
人譏餘光葆秉燭聞道尚庶幾

趙北口

未信斯鄉足隱淪燕南趙北總歸秦傳聞地有悲歌士太息時
無絕代人西望邯鄲雲漠漠東連督亢水粼粼祗餘掘鯉荒寒
淀隱柳斜陽媚小春

東光

繞道入東光空林帶夕陽寫心無舊雨添鬢有新霜郵置愁程
改村行苦里長試登高處望宛在水中央

宿德州

老屋夜生寒無眠漏向殘如何冬入律猶自地浮瀾辛苦憐兒
小寬嚴馭僕難閉門把書讀閒趣憶長安

兗州改道山行

山程水驛此分歧問語來轅忍我欺入隘路仍疲馬導衝寒身
尚舊貂披盤飧官樣啣供頓雲樹人生感別離眠食高堂知健
否春風歸約敢愆期

南沙河追懷童望軒王村漁

無那同岑竟異昔荆扉依舊水邊開傷心十六年前事乘傳今

朝獨自來

靈壁道中

終軍繻棄漫誇豪杜老詩成歎汝曹
草草一宵同露宿行行卅里又星高
掀公于淖僕夫瘁俟我乎庭郵卒勞
聞道村氓半流徙年來河患奈頻遭

小葺頤園工竣有作

荒寒如此識官貧孤負園林大好春
野竹餘根猶放篠古梅摧斫已供薪
極知傳舍身同客聊借雲山境養親
清俸堪支小脩飭計工于指役三旬

舊時庭宇戒重添壁但加塗紙補黏
徧置曲欄扶藓磴暑遮虛牖挂筠簾
溝除叢礫通流水亭縛香茆覆短檐
檢取竹頭兼木屑士行原未取傷廉

垣鋪蘿薜徑鋪莎幽趣天然足嘯歌惡木僉人宜痛絕好花名
士那嫌多樹刪狂蔓屏重整池拭枯萍鏡乍磨也算年來小經
濟要畱遺愛在庭柯

頻年鴻爪滯京華將母心酬奉使槎敢說養親能養志須知培
士等培花星輶催發還遵路鷺驛馳歸便當家安得鑑湖援往
例數椽娛老水之涯

春仲頤園

雨後園林絕點埃曉行隨意踏蒼苔綠楊影裏黃鶯集紅杏香
中紫燕來得氣草還隨地長無名花亦趁春開餘霞澄練渾依
舊欲賦曾無謝朓才

曉行

宵鼓夔夔始罷撾客中晨起每先鴉霧鋪平野明如水日映高

雲散作霞百里將迎勞驛館三時耕作媿田家經綸不解文章
拙何補蒼生暗自嗟

余忠宣公祠落成敬題二律

七年宣慰志堪哀難禁探丸起草萊江上望風降款納宮中行
樂道場開家承庭訓全忠節寇駭儒臣擅將才博得與王還歎
息有人銜詔守祠來

清水深深尚有塘照公千載見冠裳紇千雀凍生何樂城社狐
鳴患早防此日沈淪悲楚些當年捍蔽仗睢陽墓田畱得田橫
在衰草寒煙忍久荒

頤園隙地擬補栽梅舒蘭舟誤購牡丹見貽賦此道意

苜蓿盤中閱歲華數椽官驛任欹斜能娛親卽神仙地敢學花
栽富貴家豔質祇宜金屋貯荒庭難共玉堂誇獨餘風格寒梅

似裁稱山厓與水厓

太白祠觀蕭尺木畫壁

采石百尺臨江磯待渡舟向磯前維巍樓遠眺豁心目振衣雲
表風披披山僧導我看畫壁心慕登陟忘身疲頽垣剝落已過
半就視元氣猶淋漓泉鳴雷兮鬱律峯插天兮傾欹金碧眩轉
神光陸離細欲到毫髮大可吞須彌巧奪造化無畱遺想當下
筆發光怪照耀江水驚蛟螭羣仙諸佛率岳瀆先後風展雲中
旗對之各各合十指讚歎不已還吁噉回看江水繞檻外但杯
勺耳慚馮夷由來畫壁數道子普門寺燬餘荒基我曾耳聞未
眼見見恐遜此煙雲奇楚騷畱圖止尺幅描繪江茵兼江籬幼時
聞孫雲壑所藏蕭尺木所畫離騷圖刊斯圖拓乃大踰丈能事鉅細同游嬉
本其真蹟藏內府乙亥歲復見之蕭生蕭生以畫隱鸞鶴苦被烏鳶欺借丹青之突兀狀人世之

嶮巖其閒笑罵雜涕洟觀那知徒愕眙嗚呼噫嘻才人少偶
多數奇徑思寫像配太白江水可侑清而漪詩仙畫聖相顧應
解頤卻恨如山四壁難力移欲卷不得使我歸路悽心脾

采石廣濟寺觀五色石鑪

江上磯無限名傳采石何博山階蹟在蕭寺訪僧過此日依龍
象當年掩薜蘿劫餘仍燦爛愛甚幾摩挲製樣摹匡阜鑄銘缺
籀蝌歲時迷甲乙記載惜蹉跎莫騁奇觚辨徒遭贗鼎訶村氓
疇攷古邑乘例傳訛擾攘黃初載繁華白苧歌代難詳魏晉燒
不假官哥貯水宜名鉢銷金合喚鍋載應從瀚海撈豈自闕河
漆點浮醅蟻銀光出繭蛾口脂痕淡抹眉翠影斜拖黃膩臍刻
蟹紅鮮掌擎鸞肝腥乘活割嶺溪硯材有豬肝
色者以皂清為上腦凍忍寒呵關中產印石有
魚腦凍一種
鉛訝流丹汞銅疑嵌紫磨翩翹圖捷翅班剝綴蜂窠甲片拚淵

豔峯尖削塞駝芙蓉堆列嶂玳瑁貼澄波脰瘦跗承鄂腰肥綬
曳綳墨華煤受杵機影錦騰梭交互花剪巧叢殘葉碎荷徐州
分色麗泗水較音和脈隱膚開粟紋旋指上螺土侵呈異藻泉
滲漾微渦斷擅成風技脩操斫月柯繪須攜彩筆捧合倩妍娥
驚勢貞乾竺潮音小普陀妙香升郁烈勝境峙差義往者舟師
集瀕江戰柵多烽煙明斥埃劍血漬蛟鼉分共金甌破拚借石
鼓馱護持憑鬼物雷鎮在巖阿地悔山藏寶天教佛懾魔驚心
逾揭鉢援手仗兜羅清淨歸蘭若興亡閱利那腹虛堪納芥膚
滑肯箇莎古質仍完好新癢待刮劑衲閒勤洗滌客賞累吟哦
邛壑材奇詭雲煙影盪摩未妨同雪浪高詠繼緝坡

全椒曉行

五雀聲中曙色分
草香村路翠繽紛
林園謝女青綾障
波展羊

家白練裙老麥刈遲黃映日新秧栽早綠鋪雲煙蕤風笠千疇
徧慚愧山農力作勤

和陽道中

繡壤碁交畝野連纔行東陌又西阡園林風景重過地煙水江
村入畫天千壘泥香巢紫燕一犁雲重駕烏犍田家樂寫吳興
好詩句分明滿眼前

宵於內符觀趙松雪書十二
月田家詩詩與字真雙絕也

坐滁州廳事有作

分棚齊燕燭枝枝握管無聲悄搆思炊黍時光原不易飲冰心
蹟諒同知金針度與隨人巧玉尺量來遇我遲一樣雞鳴殘月
上累親無睡憶兒時

余初赴縣考時先人有雞鳴
夜過牛月上天未曉詩句

春雨連綿不能校射紙悶作

黃茆白葦寬無餘準擬來朝泗上居雨溼健兒盤馬路天畱太

史採風車身閒空聽晨衙鼓手檢難忘幼讀書忽憶新栽小桃
李灌園心在未消除

校射滌郊寄內二首

桃杏頤園樹春添種幾枝草芟苔淨徑風暖日高時引策披書
幌扶軒進酒卮何須奏絲竹鳥語聽參差

凌雜齋鹽事由來仗婦謀讀教兒上口妝倩婢梳頭老屋牽蘿
補芳林結果稠平安書好寫因便付官郵

游瑯琊山開化寺

峭壁巉巖斧削成萬蓮花照佛頭明傾崖裂罅雲橫補怒石嵌
空樹倒生絡野籠山澗翠色縱箏戛箏暗泉聲潮音滿耳滄溟
近身在蓬萊頂上行

詠石生柏

豐樂亭迤西建有藥王宅道人指謂予看此石生柏有石如砥
平廣丈高累尺柏生於其中陰散一庭碧蟠根在石面穿石了
無隙我聞石山骨凝以山之液得無柏生時液涌石爲拆分條
勁而聳布葉疏且瘠如餓蛟拳空如老鶴舒翮又如病維摩背
露寸寸脊藥王試脰之中有清淨脉再過一千年柏亦化爲石

吳聽山見和石生柏詩復用前韻

既恃石作田奚取土爲宅銅柯兼鐵幹驚見此老柏亭亭插天
半地竟不階尺自踵以達顛都帶石色碧何年鵲銜子飛過墮
石隙遂胎石腹中穿透石流液柏石亦強分一氣所凝拆蹟倅
菩提淨貌過瞿曇瘠相對但名緇來棲少凡翮孤根絡山址清
陰滿山脊以彼堅貞姿與石本同脉消息乘化機何疑一拳石

來安道中

高下彎環路幾重，綠崖登嶂草茸茸。
村堪入畫因臨水，山奈如文不作峯。
巖日林風寒又暖，露花煙柳淡兼濃。
春光苦愛西冷好，湖畔何年策短筇。

來安晤同年陳愛堂廣文

巖谷同棲隱，詩書不療貧。
嫌奴分苜蓿，慰婦耐艱辛。
雞肋悲生世，豬肝恥累人。
慎毋輕十室，芳草一般春。

抵盱眙

露桃灼灼柳絲絲，又近清明改火時。
不少雲煙過眼底，每因風雨惜花枝。
老來倍覺春堪戀，病後初驚酒不支。
一霎鉦旂炫巖谷，晚仍孤館自扶持。

盱眙黃令餉酒酸甚戲簡

味酸時序應春和，欲啣其如螯口何。
小邑頭銜梅尉稱，秀才風

味麴生多麩餘薺菜三生是醋比桃花十倍過擁鼻無妨詩思
滅燒春聊取醉顏酡

煦齋師紫驢馬圖

蒲梢豔歌天馬來緩急難恃終駑駘是非真鑒定平日倉猝那
得超羣材想師當年銜

命急策馬宵馳人辟易草頭一點疾于飛陡視來朝鬣半白詩
與杜老將毋同與人一心成大功乃知騏驥世不乏所患駕馭
非英雄眼前曾受師知者豈盡其才古今寡但供驅策無棄能
吾師愛人如愛馬況復神駿真騏驎韓幹貌出猶未真功尤高
者酬亦異吾師愛馬如愛人頭白還憐門下士遠寫新詩教送
似願師推廣愛馬心惠養蒼生亦如此勲業巍巍范與韓卽今
天下藉師安佗年冀北身重到願効馳驅待控鞍

初夏園中

別記梅芬繞畫廊歸來槐蔭徧芳塘蛙聲聒耳白雨點欄豔照
杯紅珀光清露浥荷浮沼滿怒雷驚筍過檐長南薰五月陂塘
早選樹陰中納晚涼

嘉樹軒夜坐

似弦容易月沈西秋暑高齋捲幔齊蟋蟀有聲宵露重芭蕉無
影晚煙低廊寬榻任縱橫設几淨詩從爛漫題衙鼓易催燈易
地倦依藤枕聽鳴雞

園亭納涼

一室何妨暇埽除灌園心事未全疏
鼙警響騰叢薄蜂蝶銜香度綺疏
杞可延齡甯子種葦防增暑課丁鋤
棟花風後槐陰滿又是炎梅藻夏初

艤舟采石

翠螺山色暮煙迷一宿蘆根就短隄風水有聲悲捉月魚龍無
影怕然犀村墟此日安耕鑿樓櫓當年駭鼓鼙懷古易生今昔
感片帆凌曉渡江西

月夜泊舟牛渚放歌

牛渚舟載月浮太真照太白游晉人儺儺唐風流牛渚舟乘月
到張翥游黃姑照河漢盈盈天上擢人閒天上月一般漢時月
到唐時圓酒杯在手月在川錦袍玉帶須眉燦然時無謝朓餘
子安足傳黃姑隔河漢大笑文星謫墮來人寰靈梭偷得月一
彎助爾文章雲錦陸離璀璨成奇觀江石齒齒江流湍槎枯不
靈犀罷然當頭明月光滿船滿船月勝晉時月看月樓長存太
白白紵山荒歌舞歇

渡皖江

倚山城郭小瀛洲
喚渡鳩茲最上游
慈姥白雲天際仰
小姑青嶂雨中浮
帆檣影聚臨江塔
雲水痕迷隔岸舟
名勝畱題笑無分
且將風景眼前收

金陵口占

白髮蕭疏攬鏡看
冶游知效牧之難
祇餘丁字簾前水
尚許匆匆一倚欄

壽內四十

小春時序啟陽和
楓葉蒸霞月漾波
家慶高堂斟鶴筭

聖恩清秩轉鸞坡

時勢難在

莫嫌蘭質雙雛小
須省萱齡八表過
若

較歲華君始半福祺
端貴後來多

勞生花甲笑將周
到此蓬萊足暫畱

皖城以臨江名小蓬萊

一盞先卿剛兩日

余以十月十八日
生丙子以二十日

十年遲我又三秋

丙子
十三日

籬英小圃簪新朵樽酒前宵

貯舊筓慈壽已高名已僭擬歸同挽鹿車游

寄示琨琮兩兒

書是吾家業晨昏好伴師易生因讀嬾難起爲眠遲捉蜚風中
徑塗鴉月上時亦知憊且魯垂老總心慈
排行名最後生小性偏強取鬧分餐慣爭先就塾忙口能邀母
愛肩亞其兄長可解思耶否平安字寄將

題口文莊公墨刻

有明英宗朝奄宦勢薰灼躋其煬蔽甚與天啟相若長秋旣晏
駕土木難旋作是時國元氣雖剝未全削高皇政尙存培養人
材博盈庭賴羣彥旋轉乾坤廓獄嶽文莊公秉正露鋒鏑司成
與北李先後聲炳燦一朝忤貂璫屏棄數階落怡然返舊林寄

志在邱壑孝養仍力耕性分見真樂讀公示懷詩信足風浮薄
我前纂明鑑持論頗諤諤公傳史冊留得以觀大畧知公雖暫
黜再召入臺閣秋榜兩持衡多士矜矩矱回看側媚輩飄若風
掃萍出處較之公地下能無忤履堂其裔孫外翰職司鐸遺澤
世珍藏貞珉手親拓爲諸生祭酒名教所寄託勉旃崇令名嗣
響華亭鶴

曉度箬嶺

一宵宿招提飯藉僧供養晨起叩村醪聊取敵嵐瘴天寒似欲
雪先以雲醞釀脩途畏泥濘況乃陟羣嶂欲止又不能前去拚
孟浪我雖行李貧竇從勞拚搗竹輿長且窄坐若浮輕舫山雲
疊層波波際自搖漾頻年苦校閱身墮文字障山靈亦作惡一
色貢花樣陰霾滿眼前何以騁遐望登登厯坡陀石徑高以亢

路人指謂子徑乃程氏初自此免途窮功德浩無量蟻行磨旋
折內念卻諸妄幾折復幾盤已在層霄上長風從西來雲氣卷
如帳巍巍遍天門萬里開誅盪此心誓天日應獲山靈諒不遣
風雪侵額手謝神貺嵐光承日華空際互摩蕩夾徑植脩篁翠
影風微颺誰言冬凜烈已覺春盎盎塞帷視輿夫單袴同挾纊
其下羅諸峯失喜見來剎端正如定僧十百拱而向一一頂可
摩都現壽者相爭高有黃山勢已足相抗如觀古奇作一筆不
平放平生百無能筆詡頗跳宕縱非凌雲才出語自清曠文到
意境平誨亦倦大匠山椒設關隘列卒編伍兩疊石爲城形低
駭身入壙一夫此當關力敵萬人將菴僧邀客坐苦茗一杯餉
卻顧此時身孤絕無倚傍切須自立腳僕從那足仗顯晦閔須
與千態更萬狀此身百年內堪以取相況莫恃膽氣羸進競輸

退讓同行有吳子
膽怯神沮喪舍輿而徒行
遮蔭不能仰無何
踐平阜爲賀今無恙
轉思垂堂戒臨風一惆悵
何處答清吟遙
林度樵唱

題陶雲汀前輩漕河禱冰圖卽用印心石屋詩集中嘉山

懷古元韻

昔聞杞梁婦以哭摧長城
又聞精衛鳥銜石填東瀛
人事多錯忤端賴正氣撐湖濱
有貧女薄暮荒郊行露居
以蚊死奇烈天震驚
流傳奉俎豆歲久祠敞傾
惟公持節過廟貌瞻如生
時漕值冰阻禱恃心冰清堅
冰忽破碎神鑒公忠誠
節相聞於朝賜額輝丹堊
有功合崇祀豈獨諧輿情
揮塵讀公記時候方長
羸懷哉忠與烈千載同令名

金陵道中遇雨

村路程長兩怕侵遙峯爲我展層陰江邊風色停蘭棹竹外秋涼透葛襟雷壓餘炎沈極浦雨拖殘照下平林眼前情景渾如昨暇摩苔箋續舊吟

長夏頤園奉母譙飲

長夏江鄉節物妍綠蔬丹果遞登筵羹調玉糝流匙滑膾斫銀鱗出網鮮花覆滿庭槐綻粟筍生當砌竹行鞭輕軒游覽嫌風日擬拓虛廊近水邊

園亭卽事

楫題新額小簷簷蘿薜周遭覆短牆砌草辨名多入藥檐花垂實好充糧筍從比舍貧兒竊槐爲連年舉子忙熱惱不來山雨過蟬鳴高柳又斜陽

初秋園亭納涼

虛亭面面接山光
山缺屏風借綠楊
一鷺影明晨靄散
萬蟬聲急午曦長
碧梧葉大秋先入
紅藕花多水亦香
巾拂任閒蒲篋
屏竹颼吹鬢有新涼

別梅

古梅三十株栽傍
小山址梅緣山高
下松竹相間峙
高循欄曲折下
俯水清泚春風
次第開花信從
此始一花一美人
態各不相似羣
然顧我笑璀璨
啟玉齒奈我將
遠行無計能暫
止挂帆有樓船
遲我江之涘悵
然舍之去俗甚
心自恥此中戀
戀情勝似別妻
子想見逋仙翁
高致亦如此

憶梅

我見梅花開不見
梅花謝梅花謝
復開媿我時少
暇去年梅開
早苞蕾先春卸
看到殘英飛
隨風點亭榭
今年梅開
遲雪又盡

連夜一雪遲一旬我早征鞍跨途中偶亦見幾樹疏籬亞何能
供把玩過眼煙雲化昨宵夢見之沈醉花之下覺來殘月影數
點漏窗罅得毋梅花魂伴我過傳舍

盱眙曉行

小邑程無幾來時路再經鹿場含露滑魚市散風腥湖曉開妝
鏡山春列畫屏忘機相對好鷗鳥滿沙汀
冒雨花仍發披風草不凋棲巖高下屋浮浦去來帆蘚徑紅藤
杖疏畦白木樨何時雙蠟屐郊外試春衫

盱眙春望

籃輿一徑上崔巍樂事看山願不違豁眼湖光千頃活關心春
色二分歸幾家結網臨清漲萬竈綠崖對落暉東望姑溪時極
目登高容易念庭闈

陸覺蓬瀛入望中，碧天如畫展長空。
山腰山腳千花裏，淮北淮南一葦通。
地險不勞城郭壯，時清還藉稻梁豐。
來安東去程非遠，纔有林泉便不同。

題盱眙周天石明府菜羹香書屋吟稿卽用稿中謝王柳村見題詩集和作元韻

結交徧天下，什九佗鄉人。
我廬與君居，同在明湖濱。
昔與君從父，文字相交親。
譚藝頻過從，脫畧兩率真。
逢場習竿木，僑業多苦辛。
鏤刻賢與肝，無補勞精神。
回思卅年事，添鬢霜華新。
當時忽阿咸，那料才超倫。
蒲鞭守家風，能吏何如循。
宦途鴻印雪，偶聚亦有因。
示我新詩篇，風骨七子遵。
詩成訟庭暇，傳寫人見珍。
不嫌宦未達，不詫志未申。
花封領百里，原野隨時巡。
峩峩都梁山，俯瞰涯無垠。
登高緬劉項，失鹿懲暴秦。
詩境滿目前，宜駐詩

人頻

泗州牧劉海樹能
詩有亦政堂集

扇門笑我俗倡和虛主賓三年職採風慚少詩

入陳諸生儉腹笥急資糧餽貧助我張騷壇大雅看扶輪

題家書後

老母平安否顏違又月餘河鱗無寄鮓江翻有傳書紀候分晴
雨憑郵問起居歸田吾已決妻子意何如

登盱眙第一山絕頂

憑高容易縱吟眸山影湖光一覽收樓閣參差紛可數煙雲摩
盪勢如浮事傳劉項交爭蹟地控淮揚最上游慚媿十年香案
吏此身今始到瀛洲

自盱眙赴來安

此行聊免雨吹幃石磴千盤黛四圍綠樹有陰畱客住青山如
夢放春歸林泉樂事饒心賞僮僕長途勸指揮寄語村農安力

作莫求榮使素心違

次凌芥山來安道中

青青看徧畝南東露氣晨霑土脈融
交夏麥田齊望雨近江茆屋易生風
沒腰水少年愁歎迎面山多路怕窮
我自行程有前定尅期爭敢爽兒童

度古城山次吳聽山韻

上山邪許忽聲驚磐石紛鋪勢動搖
剩有亂荆鈎馬足絕無纖柳舞蠻腰
農貧櫟社標村冷路賤楓亭記里遙
卻憶買春移畫舫玉壺排日燕鶯招

卽目

湖澗緣崖境阻脩筇興搖漾類行舟
黑甜醉僕橫騎馬白禿頑兒倒跨牛
近野耕耘多健婦遠山憑眺少高樓
飛飛還止心閒

甚輸與沙汀白鷗

琳兒書來言頤園新栽碧桃盛開牡丹發有二十六蕊詩以曉之

栽花曾不見花開聞道春風笑我駉樹長須遲十年後成陰畱待後人來

浴香泉值風

暖波浮砌影徘徊方丈維摩斗室開喜仗大風吹垢去戒同新沐整冠來陰陽自解然爐炭拂拭何勞喻鏡臺也識緇塵抖擻盡澡身原不在形骸

再過古城山

槐角萸芽滿眼前綠疇行盡見人煙山鋪十里平於地村隱千家別有天亂石排雲成睥睨陡崖臨水作關鍵夕陽芳草當時

路策馬重來又一年

園亭寫望

濃翠千林漲半篙
暖風芳陌度
飴簫林花繞
郭春如海池水通
江夜上湖牛渚澄
瀾空外展龍山晴
黛望中遙
興來欲訪元暉
宅
天半餘霞手可招

桑柘

桑柘遲遲日
鶯花去去春
雲依山學靜村
借樹遮貧淺
綠葭浮
纈微黃
麴散塵
風光自流轉
相賞歲華新

聞琳兒春闈被放

勞勞南北往來頻
縱異饑驅也受辛
空累高堂占吉夢
又看游子洗征塵
爾原學減趨庭日
我亦情同下第人
最好時光須愛惜
羣居休再樂因循

慰陳扶雅下第

高文準擬奏明光何又輕裘典驢驢見說來年仍應舉未知流
寓抑還鄉歸原不失真名士老奈頻經古戰場莫爲浮榮虛定
省相看同此鬢邊霜

頤園雨眺

當空火繖勢方驕失喜煩襟向晚消雲漏日華垂雨脚電流虹
影繞山腰芙蓉經洗紅妝淨楊柳迎涼綠鬢凋搖落不須遲暮
景小山歸隱有人招

和吳聽山皖城試院作

聽山先生家維揚總角憶昔來吾鄉萍蹤一別三十載風雨何
意仍聯牀嗟余早衰學荒落評古不啻同羣盲打包纔了又飛
錫終歲行腳如僧忙小蓬萊在大江北霜未隕葉風先剛院門

出坐夜未午要離怯似迎風僵千人呼噪勢難遏攘臂而進如
排牆此時卻羨少年樂與君湖畔閒傾觴

初冬頤園卽景有作

雲水難畱欲去身重拖雙屐眺清晨選枝拱跼烏憐母穿草沖
飛雉駭人蔥蒨山光題可徧丹黃林影畫難眞明年此地知誰
在日夕來過不厭頻

留別頤園

亦知同傳舍無那意難忘隙地閒雲駐寬庭愛日長徑通挑菜
渚村接養魚莊草木心珍重平泉記載詳
最愛山亭廠虛簾不上鈎斷霞明雉堞蒼靄暗漁洲蛾影青山
展螺痕采石浮四時煙景好都向望中收
亭畔空心柏皤然倚若峯葉香宜宿鳳枝老欲成龍雷火燒痕

舊霜華黛色濃偕松強同調無意更邀封

古槐高百尺時代莫能名似蓋繁條布如槎老榦橫葉從崖下
覆根向石中生好在交初夏閒關聽鳥聲

臨池亭亦好支木作平橋白藕花翻雪青萍葉捲綃空明人在
鏡消長水通潮歸臥滄江晚成連不可招

園中足嘉卉第一數梅花仄徑扶筇探低枝壓帽斜蘚痕青剝
落羅影翠交加不盡相思意神仙萼綠華

就中難捨甚脩竹是深交夜月看篩影春風聽坼苞酌刪鋪砌
篠畱長出牆梢中有柯亭實園丁莫浪拋

日涉還成趣慈闈樂有餘丹黃收夏果蔥翠剪秋蔬千里催歸
棹三年許暫居故園燕已甚親抱可能舒

諸葛鈴

刁斗聲嚴陣雲合萬馬銜枚屯不發夜半中軍有令傳白月如
霜照毛髮一鈴高揭當風鳴寇未見敵先聞聲司馬家兒逞疾
走可憐草木皆成兵當塗讖成龍反臥掩耳而偷蜀全破羽扇
綸巾歸去來鈴亦先隨將星墮漢帝唐宗歲幾經淒涼蜀道雨
淋鈴臨風枉自思才子丞相祠堂何處尋

詠時辰表

儀器傳泰西天象藉分曉寒暑及時辰各各創爲表其中安數
輪或豎或平掉堅剛鍊精鐵交迂向輪遶最高設巨輪內有游
絲長往來勢盪激聲振清而矯遂使輪轉旋如齒身自絞可憐
上簇蠶不盡絲不了其而橫置鍼數亦判多少九十六刻中剖
析到分秒回環辰十二辨酉卽知卯恃鍼猶指南初正別皎皎
疇云度難測收以一握小能事在專精技也進乎道卻思山農

家無分購奇巧何嘗昧昏旦斜月視林杪所資音激越深夜聽
悄悄一聲一過去旨可參三藐逝乃如斯夫塵勞漫相擾

病中聽雨有作

一番風雨一番寒病不成眠夜向闌落葉最宜林下聽黃花仍
向日邊看年將衰老身應退官太清閒境卻安祇有三生文字
債筆孱才薄埽除難

時入都復命
將告養親歸里